

Nan relato oficial ta mustra...

CONTROLADORNAN DI CASINO NO KIER SISTEMA DI 24 ORA PA DIA

Deseo pa Gobierno resolve e problema aki pronto!

ORANJESTAD (AAN): E asunto di ceramento di un casino banda di 5'or di mainta, durante e fin di siman di 15 di October ta sigui ricibi reaccion.

DIARIO ya caba a ricibi varios reaccion, incluyendo algun mayor di e empleadonan, di varios lector, y tambe di algun persona hopi yega na e controladornan.

Sinembargo awor a ricibi reaccion di e Sindicato di Controladornan di Casino Arubano (SCCA). Nan ta desea pa duna un clarificacion pa tur lector sa kico realmente a sosode.

Cu e Ministro ta e autoridad cu ta stipula e ora di cierre pa tur Casino ta un realidad y esey ta un competencia pa cu su maneho locual a ser confirma tambe door di un carta cu tur Casino a haya for di Gobierno, y cu nan mester atene nan mes na dje y cumpli cune.

E BERDAD: E intencion di e Sindicato no ta pa dreña den polemica cu ningun Casino, ni operador di Casino, sino simplemente duna e version corecto pa asina kita tur dudanan cu ta e Controlador lo por a actua fuera di su responsabilidad.

Segun SCCA, ningun momento e Controlador a bisa e Shift-Manager cu e mester cera e portanan di Casino! Simplemente a puntra si nan tin un permiso pa laga e me-

sanar den Casino habri, ya cu 4:00 a.m. a pasa caba y ley ta stipula te cu 4:00 a.m.

Tampoco no tabatin Torneo, y e Sala Privada ta completamente bashi.

E Sindicato ta bisa cu enberdad ora tin Torneo, tin dos Casino na Aruba cu permiso special pa keda habri, pero mester pone enfasis cu den e caso aki e ta valido solamente pa e Sala-Privada (Prive-Ruimte), y pa cierto hungadoman inscribi den e Torneo y cu tur portanan di Casino mester ta cera pa tur otro hende sin ningun excepcion.

Pa SCCA, esaki no tabata e caso riba e madrugada en cuestion.

Pues, basa riba e contesta cu e Controlador mester a haya, lo e mester traha su rapport. Esaki ta algo normal den su funcion y esey ta poni bon cla den nan "taakomschrijving".

LOKE A PASA: "Si bo nota cualkier irregularidad, ta bo deber di raporta esaki na bo Hefe di Departamento. Y si bo tini un permiso den bo poder, no tin nada pa laga un problema escala sin necesidad," e representantenan di Sindicato SCCA, esta Raymond Maduro (presidente), y Jose Giron (secretario) a declara na DIARIO.

Riba e fin di siman ey, e Shift-Manager na e momento ey no por a duna ningun contesta riba esaki, y el a tuma contacto cu su superiorman.

"E contesta cu e Controlador a ricibi for di e personanan aki tabata, cu 'nos no tin nada di mustrabo y si bo

kier bo ta yama Polis,'" e Sindicato a bisa.

Pues akinan e Controlador a ser pidi payama Polis, loke el a haci tambe.

Momento cu Polis a presenta y a pidi pa mira tal permiso, nan a haya como contesta cu enberdad esey no ta existi! Akinan autoridad corectamente a bisa e personal di Casino cu loke nan ta haciendo ta contra ley y cu nan ta actuando ilegalmente.

DIARIO a compronde cu riba indicacion di e autoridad aki, e Casino a dicidi di cera su portanan.

OPINION SINDICATO: E deseo di Sindicato SCCA entorno tur e problemanan aki sigur lo ta pa Ministro di Justicia Watty Vos trata na resolve e problemanan aki satisfactoriamente, como cu e ta algo cu ta afectando no solamente e Controladornan,

pero tambe pueblo Arubano cu ta sintie discrimina cu e sistema actual.

Ta trata aki di e sistema unda mester saca Arubianonan pa 4:00 a.m. for di den Casino y laga tur extranhero y turista den Casino y cu porta habri pa nan dreña.

"Nos ta di opinion cu si tin un ley pa cera tur Casino pa 4'or, e mester ser respeta pa tur Casino. Ta Gobierno ta goberna e pais aki y nos ta kere cu mester respeta decisionnan tuma door di gobernantenan," e Sindicato a bisa.

Tur loke e Sindicato a declara akinan, ta loke a

sosode y cu a worde raporta por escrito na e Departamentonan concerni.

RESORT ISLAND: Manera e opinion di mayoran expresa den DIARIO contra e trahamento di 24 ora, por a nota cu Sindicato SCCA tambe ta spera cu e maneho di Gobierno lo no ta pa duna Casino permiso pa traha 24 ora.

"Pasobra Aruba mester keda pa nos un 'Resort Island' y no un 'Gamble Island'," e Sindicato a bisa."

Nan a termina bisando: "Un pueblo sano, ta un pueblo bon informa y suficientemente bon descansa."

TELEFONNAN DI DIARIO
26747 - FAX - 28551

SOSEGA HENTER DIA PA DRUMI BON ANOCHI!!

